


# LEWALITABA

Leselinyana la Lekhotla la Taolo ea Motlakase le Metsi Lesotho



**TSE KA SEHLOOHONG:**  
Metsi ke tokelo ea botho,  
e bohlokoa ntšetsopeleng  
ea naha **3**

## KA KHATISONG ENA...

**4** Bohlokoa ba matla a inchafatsang lefapheng la phepele ea motlakase la Lesotho.

**10** Lingongoreho tsa sechaba mabapi le phano ea litšebeletso Mefapheng a ESI le UWSS

**13** LEWA ke Molula-setulo oa komiti ea AFUR




## Uena u tseba ha kae ka LEWA?

Ka Lefapha la Litaba tsa Basebelisi ba Litšhebeletso le Khokahano, Lekhotla la Taolo ea Metsi le Motlakase Lesotho (LEWA) le ikemiselitse ho hlalosa sechaba ka mosebetsi oa lona holim'a taolo ea litaba tsa motlakase, metsi le likhoerekhoere. E le ho fihlela katleho boikemisetsong bona, Lekhotla le sebelisa mekhoe e mengata ea ho buisana le sechaba. Mehlala ke ka likoranta, liea-le-moea le telefishini.

**Bakeng sa litlhalosetso tse pharaletseng,** u ka fapohela Lesotho Electricity & Water Authority

7 Floor, Moposo House, Kingsway, Maseru, Lesotho

Tel: +266 22 312479 Fax: +266 22 315094 Email: [secretary@lewa.org.ls](mailto:secretary@lewa.org.ls) Website: [www.lewa.org.ls](http://www.lewa.org.ls)



## LEWALITABA

LEKHOTLA  
LA TAOLO EA  
MOTLAKASE LE METSI

7 Floor, Moposo House, Kingsway  
Private Bag A315 • Maseru  
Maseru • Lesotho  
Tel: +266 22312479  
Fax: +266 22315094  
E-mail: [secretary@lewa.org.ls](mailto:secretary@lewa.org.ls)  
Website: [www.lewa.org.ls](http://www.lewa.org.ls)

MOOKAMELI  
Motlatsi Ramafole  
Email: [MRamafole@lewa.org.ls](mailto:MRamafole@lewa.org.ls)

MOOKAMELI OA LEFAPHA LA  
LITABA TSA SECHABA  
Shao Khatala  
Email: [skhatala@lewa.org.ls](mailto:skhatala@lewa.org.ls)

OFISIRI EA LITABA TSA SECHABA  
Sebusi Khanyela  
Email: [skhanyela@lewa.org.ls](mailto:skhanyela@lewa.org.ls)

LEWA LITABA ke leselinyana la Lekhotla la Taolo ea Motlakase le Metsi. Le hatisoa ka Senyesemane le Sesotho. Le fuoa batho bohle ba nang le thahasello litabeng tsa Lekhotla.

Maikutlo a hlahang leselinyaneng ha se a Lekhotla. Lipapatso tse hlahang ka ho lona ha se tse supang maikutlo a Lekhotla.

Litaba tse hlahang ka ho lona li ka hatisoa ntle le tefello ha feela ho ngoloa hore li tsoa ho LEWA LITABA. Re ipiletsa hore batho ba eelloe hore ho nka nakoana ho etsetsa, ho tlosa le ho etsa liphetoho lethathamong la batho ba fumanang LEWA LITABA.

Boqapi © LEWALITABA 2019

# TSE KA HARE

## MOLAETSA KA MOOKAMELI

Bohlokoa ba matla a inchafatsang molemong oa ntšetsopele 2

## METSI KE TOKELO EA BATHO

e bohlokoa ntšetsopeleng ea naha 3

## BOHLOKOA BA MATLA A INCHAFATSANG

lefapheng la phephelo ea motlakase Lesotho 4

## LIPEHELO TSA WASCO

bakeng sa basebelisi ba lefelling metsi pele ho tšebeliso 6

## TSE LING TSA LIQHOLOTSO

tsa mehla tsa phano ea metsi 7

## LEWA E LAKALETSA PROFESSOR MOLEKO

Tsela-Tšoeu 8

## LINGONGOREHO TSA SECHABA

mabapi le phano ea litšebeletso Mefapheng a ESI le UWSS 10

## LEWA E AMOHELA

Mookameli e Mocha 12

## LEWA KE MOLULA-SETULO

oa komiti ea AFUR 13





Babali ba khabane,

**K**ea le amohela khatisona ena ea boraro ea Leselinyana la rona. Leselinyana lena le tlaleha ka tse ling tsa lietsahala tsa nako ea likhoeli tsa Mphalane ho isa ho ea Tšitoe 2019. Re etsa sena e le ho phethahatsa boitlamo ba rona ba ho boloka likamano tse mofuthu le tšebeliso-moho le lona.


Leselinyana lena le phuthetse litaba tse fapakaneng tse reretsoeng ho fana ka tsebo le ho ruta babali ba lona ka tse ling tsa lietsahala tsa bohlokoa Lefapheng la Phephelo ea Motlakase (ESI) le lefapheng la Litšebeliso tsa Metsi le Likhoere-khoere Metseng e Literopong (UWSS). Har'a litaba tseo le ka balang ka tsona ho kenyetsetsa bohlokoa ba matla a inchafatsang (renewable energy) molemong oa ntšetsopele ea moshoelella.

## Molaetsa ka Mookameli

Re boetse re tšohla lipehelo tse laolang tšebetso tsa K'hamphani ea Metsi le Likhoere-khoere (WASCO) ho basebelisi ba lefellang metsi pele ba a sebelisa (prepayment customers), lipehelo tsa phano ea libaka tsa thekisetso ea motlakase le lipehelo tsa ho khaoloa ha litšebeliso moo basebelisi ba ikhoketseng ho tsona ntle le molao.

Tlaleho ea boemo bo seng botle ba phephelo ea metsi literopong tse ka mabalane ka lebaka la komello e bileng teng ka nako eo e teng le eona e teng kahara leselinyana lena.

Maqalong a Pulungoana, 2019, Lekhotla le ile la tšoea liketsahalo tse peli, e leng ea ho lakaletsa mookameli oa lona oa mehleng, Prof. Lebohang Moleko tsela-tšoeu, le ea ho nkamohela ke le mookameli e mocha.

Tse ling tsa lingongoreho tsa mantlha tsa sechaba mabapi le phano ea litšebeliso Lefapheng la ESI le la UWSS li tlalehiloe kahar'a khatiso ena. Re boetse re tlaleha ka seabo sa LEWA litabeng tsa taolo ea Litšebeliso Afrika tlas'a 'Mamekhatlo ea Makhotla a Taolo ea Litšebeliso Afrika (AFUR). U ka fumana kopi ea leselinyana lena marang-rang a LEWA a latelang: [www.lewa.org.ls](http://www.lewa.org.ls) 

**Motlatsi Ramafale (Mong.)**

Mookameli



# Metsi ke tokelo ea batho, e bohlokoa ntšetsopeleng ea naha



Metsi ke bophelo.

**E**'ngoe ea lintlha tse mabapi le ntšetsopele lefatšeng ka bophara ke taba ea phumantšo ea metsi a noang ho sechaba le litšebeliso tse amohelang tsa matloana a hloekileng ho tsoa ho litsi tse ikarabellang le ba nang le seabo litabeng tseo. Ho latela Tlaleho ea Litokelo tsa Botho le Khoebo ea Mokhatlo oa Machaba a Kopaneng ea 2009, metsi, har'a tse ling, a hloka hahle molemong oa bophelo, tlhahiso ea lijo le molemong oa bohloeki.

## Phumantšo ea metsi ke tokelo ea mantlha

Phumantšo ea metsi e nkoa e le tokelo ea batho lefatše ka bophara. Ho ea ka tokomane ea Transformation Resources Centre's ea 2013 phumantšo ea litšebeliso tsa metsi e bolela boemong boo ho bona motho e mong le e mong a tsoanelang ho fumantšoa metsi a lekaneng, a bolokehileng, a boleng bo amohelang, habobebe, 'me a le litjeo tse bobebe. Ha re e beha ka tsela e 'ngoe, motho e mong le e mong o lokeloa ke ho ba le phepelo ea metsi e lekaneng, ka linako tsohle. Hape, phepelo ea metsi e lokela ho fanoa ka boleng bo bolokehileng e bile bo amohelaha. Tlhaloso e kaholimo e toboketsa hore batho ba lokela ho fumana metsi e le

ho arabela litlhoko tsa bona. Litjeo tsa ho ba le metsi ha lia lokela hore li be holimo hoo li ka amang litokelo tse ling tsa botho ka tsela e mpe.

## Boemo boo litaba tsa phumantšo ea metsi li etsahalang ho bona

Lesotho, joaloka setho sa Mokhatlo oa Machaba a Kopaneng (UN) le hatetse pele ntlheng ea ho etsa melao le maano mabapi le phumantšo ea metsi a noang 'me a bolokehileng. Mohlala, ha re tla litabeng tsa taolo ea metsi le likhoerekhoere re fumana hore ho latela khaolo ea 21, ea Molao oa Lesotho oa Motlakase, oa 2002 o hlomathisitsoeng, LEWA e lokela ho tšehetsa liteko tsa 'Muso tsa hore ho be le phepelo ea metsi a noang le ho pheha hammoho le litšebeliso tsa mantlha tsa likhoere-khoere tsa moshoelella bathong ba phelang literopong.

Ha re sheba le boemong ba tikoloho ea Afrika e boroa, LEWA ke setho sa Mokhatlo oa Makhotla a Taolo ea Metsi oa Tikoloho e Bochabela le Boroa ho Afrika (ESAWAS). Litho tsa ESAWAS li sebeletsa ho kenya letsoho ka tsela e toma hore linaha li fihlelle liphelelo tsa

Mooloane oa Ntšetsopele ea Moshoelella oa botšelela (SDG 6) o buoang ka litaba tsa phumantšo ea metsi le matloana a hloekileng. SDG 6 ke o mong oa meoloane e 17 ea Ntšetsopele ea Moshoelella e entsoeng ke UN ka selemo sa 2015. Mooloane ona o tsetselela hore ho etsoe matsapa ohle e le hore sechaba se phelang ho linaha tse tetemang moruong se fumane metsi a hloekileng le matloana. Mantsoe a lepetjo la mooloane ona ke: *“Netefatsa boteng le taolo ea moshoelella ea metsi le matloana molemong oa bohle”*.

Ho feta mona, LEWA ka tšebeliso-moho le WASCO e ntšitse tokomane ea Lipehelo tsa Boleng ba Litšebeletso tsa Phepelo ea Motlakase, Metsi le Likhoere-khoere (QoSSS). Har’a tse ling, lipehelo tsena li hlalosa maemo ao WASCO e lokelang ho fana ka litšebeletso ho basebelisi lintlheng tse kang nako ea ho etsa likhokelo tsa metsi le likhoere-khoere, methati ea ho khaola litšebeletso, ho bala limithara, sekhahla le boleng tsa

phepelo ea metsi, le tse ling. Lipehelo tsa QoSSS li tlama WASCO ho etsa matsapa ohle ho netefatsa hore phepelo ea metsi a nooang hohle moo ho fanoang ka litšebeletso e ba teng bonyane lihora tse 18 ka letsatsi. Tokomane e felletseng holim’a lipehelo e ka fumaneha ho: [www.lewa.org.ls/standards/standards/LEWA\\_URBAN\\_WATER\\_QUALITY\\_OF\\_SERVICE\\_AND\\_SUPPLY\\_STANDARDS\\_2013.pdf](http://www.lewa.org.ls/standards/standards/LEWA_URBAN_WATER_QUALITY_OF_SERVICE_AND_SUPPLY_STANDARDS_2013.pdf).

Re ntse re le litabeng tsa phumantšo ea litšebeletso tsa metsi, LEWA e ela hloko litaba tse amanang le litjeo tse bobebe litšebeletsong tsa metsi nakong eo ho behoang litheko tsa metsi literopong.

Boipiletso bo etsoa ho mafapha a mang a lokelehang ba kopanye matsoho ho sireletsa mehloli ea metsi le ho sebelisa mekhoha e bolokang metsi. Taba e ‘ngoe ea bohlokoa ke ho etsa hore bohloeki bo be teng ka ho fumantša sechaba matloana hohle literopong ■

## Bohlokoa ba matla a inchafatsang lefapheng la phepelo ea motlakase Lesotho

**L**efatšeng ka bophara phumantšo ea litšebeletso tsa morao-rao tsa matla a nchafatsoang ke e meng ea meoloane eo ‘mebuso e tlamehang ho e fihlela.

Ho latela Leano la Lesotho la Matla la 2015-2025, mehloli ea matla a inchafatsang e kenyeletsa letsatsi, moea, metsi, libeso le mocheso oa mokatlase oa lefatše (geothermal). Tlas’a sehlooho sena re bua hakhutšoane kamoo matla a inchafatsang a ka bang molemo naheng ea Lesotho. E le selelekela sa ho fihlela seo, tse ling tsa litaba tse hlahang tokomaneng Leano la Matla la Lesotho la 2015-2025 (*Lesotho Energy Policy*), li tšohloa hakhutšoane katlaase mona.

### Boemo ba phehlo ea matla Lesotho

Ho latela tokomane ea Leano la Matla la Lesotho la 2015-2025, ke ho isa linokong tse lekholo (100%) tsa motlakase o fehloang kahar’a naha ka metsi. Lesotho le fehla 72 MW ea motlakase ka metsi setsing sa ‘Muela. Tlhokahalo ea motlakase kahar’a naha e kaholimo ho

150MW. E le ho fihlela 150MW, ho rekoa motlakase o tsoang EDM ea Mozambique le Eskom ea Afrika Boroa. Naha e sebelisa libeso tse fapaneng ho khahlametsa litlhoko tsa ho pheha le ho futhumatsa malapeng le libakeng tse ling. Ka lebaka la tlhokahalo ea mehloli ea mafura a kang oli, naha e se itšetlehile ka mafura a tsoang linaheng tse ling. Leha ho le joalo, Lesotho le ikelelitse hore motlakase o fehloang ka metsi, moea, le letsatsi oa hloka ho ntšetsa naha pele.

Ho latela Lekala la Matla, Lesotho le ka hlahisa motlakase oa boima ba 450 MW o fehloang ka metsi le 100 MW ea motlakase o fehloang ka moea. Ha joale, le sebelisa karoloana ea linoko tse 17 lekholong (17%) feela ea bokhoni ba lona. Linoko tse 96 lekholong (96%) tsa motlakase oa metsi o fehloa setsing sa ‘Muela. Linoko tse ‘ne lekholong (4%), li fehloa Mantšonyane le Semonkong. Tlhokahalo ea motlakase e hola haholo, ‘me Lesotho le ka khona ho romella motlakase o matla a inchafatsang kante ho naha.

### Boemo ba phehlo ea matla naheng ea Lesotho



Phehlo ea motlakase ka moea.

Leano la Lesotho la Matla la 2015-2025, har'a tse ling, le reretsoe ho eketsa mehloli ea matla a inchafatsang ka 200 MW, e kenyeletsang bonyane 40 MW e tsoang letsatsing, ho eketsa malapa a nang le motlakase le ho ruta sechaba ka tšebeliso e ntle ea matla, Leano le tsoelapele ho bontša hore 'Muso o lokela ho ntlafatsa phumantšō ea litšebeliso le mahlale a matla a inchafatsang. E le ho fihlela sepheo sena, ho lokela ho be le ntlafatso ea kanetso ea matla ka ho fokotsa hore naha e itšetlehe ka mafura a tlholeho (fossil fuels) le motlakase o tsoang kante ho naha. Ho feta moo, Leano le reretsoe ho thusa ho eketsa phumantšō ea matla a morao-rao molemong oa libaka tse kathoko ho literopo ekasitana le ho fokotsa khase e bakang tšilafalo ea moea (greenhouse) lefapheng la matla.

A mang a maoala a ka sebelisoang ho fihlella tse ling tsa litaba-tabelo tse kaholimo ke a latelang:

- Ho ntša lifuthumatsi tsa metsi tse sebetsang ka motlakase o tloaelehileng meahong eohle ea sechaba, lishopo, matlo a bolulo e be ho kenngoa lifuthumatsi tsa metsi tse sebetsang ka matla a letsatsi.

- Ho thehoa ha Lik'hamphani tsa Litšebeliso tsa Matla Mahaeeng (renewable energy supply companies - RESCOs).
- Ho khothaletsa tšebeliso ea mahlale a matla a inchafatsang linthong tse kenyang chelete; hape
- Ho etsa lenaneo la matla a inchafatsang e le ho tšehetsa taba ea ho emisa tšebeliso ea mafura a tlholeho mafapheng a fapaneng moo a ntseng a sebelisoa.

E le ho tšehetsa mohato ona, Lekhotla la Taolo ea Motlakase le Metsi Lesotho (LEWA) le bile le karolo ea Morero oa Ntsetsopelē Maano a sechaba le Bokhoni ba Litsi (Development of Cornerstone Public Policies and Institutional Capacities Project) o thehiloeng ke UN hammoho le 'Muso. Morero ona o tšehetsa hore ho sebelisoa mahlale a matla a macha phumantšong ea motlakase libakeng tse hole le tse se ntse li ena le litšebeliso tsa ona. Morero oo o tšehetsa 'muso hore o fetole limmaraka tsa matla a inchafatsang ka ho hloaea le ho kenya tšebetsong maano a susumetsang botseteli mahlaleng a matla a inchafatsang.

#### Melemo e karetsang ea matla a inchafatsang

Har'a melemo e mengata re ka supa hore tšebeliso ea matla a inchafatsang a fokotsa taba ea ho itšetleha mehloling e kante ho naha ea matla ekasitana le ho sireletsa tikoloho. Matla a inchafatsang a etsa hore litjeo tsa ho hlokomela malapa li be tlaase. Ka ho kenya matlapa a motlakase oa letsatsi kapa ho khetha motlakase oa matla a inchafatsang, motho a ka fokotsa mekoloto.

Kaha ha ho na likhase tse silafatsang moea nakong eo a fehloang, matla a inchafatsang ke mokhoa oa bohlokoa oa ho matlafatsa tsela eo sechaba se ka baballang tikoloho ka eona 'me a thusa ho fokotsa litla-morao tsa pheto-phetoho ea boemo ba leholimo. Ke lilemo tse ngata joale, litjeo tsa matla a inchafatsang li ntse li fokotseha lefatšeng ka bophara ka lebaka la mahlale a macha a ntlafatsang tšebeliso e ntle ea ona hammoho le tšehetso e hlahang ho mebuso e seng e hlokometse melemo ea ona. Hajoale batho ba bangata ba se ba tšehetsa tšebeliso ea matla a inchafatsang le mahlale a moshoelella □

# Lipehelo tsa WASCO bakeng sa basebelisi ba lefellang metsi pele ho tšebeliso

**L**ekhotla la Taolo ea Motlakase le Metsi Lesotho (LEWA) ka tšebeliso-moho le K'hamphani ea Metsi le Likhoere-khoere (WASCO) le ile la etsa tokomane ea Liphehelo tsa Boleng ba Litšebeliso tsa Phepelo ea Litšebeliso tsa Motlakase, Metsi le Likhoere-khoere (QOSS).

QOSS, har'a tse ling, e na le liphehelo tse behiloeng hore WASCO e li latele sebakeng sa phano ea litšebeliso ho basebelisi ba limithara tsa metsi, ba sebelisang metsi pele e be ba lefa kamorao le basebelisi ba lokelang ho lefella metsi pele hore ba tle ba be le 'ona (prepayment customers). Leha ho le joalo, leselinyaneng lena, puisano e shebile haholo lipheho tsa *prepayment customer*.

## Karolelano ea tlhahiso-leseling le basebelisi

Ho latela lengolo la tumello ea tšebetso (licence) e filoeng WASCO hammoho le karolo ea 50 ea Molao ea No. 12 ea Lekhotla la Motlakase Lesotho o hlomathisitsoeng, WASCO e tlamehile ho ntlafatsa tsela ea tšebetso ha ho sebetsanoa le basebelisi ba metsi ba nang le limithara tsa prepayment. WASCO e lokela ho tsoelapele ho fana ka tlhahiso-leseling mabapi le litšebeliso tseo e fanang ka tsona. Lintlha tsohle li lokela li fumanehe litsing tsa WASCO sebakeng sa basebelisi ba litšebeliso tsa eona. Lintlha tse ling tse lokelang ho fuoa basebelisi ke tse latelang:

- Mofuta oa nomoro oo motho a o fumanang ha a se a rekile metsi (token) o lokeloang ho sebelisoa;
- Tsela eo mosebelisi oa litšebeliso a lokelang ho reka metsi ka eona le hore na o lokela ho a reka kae;
- Litefiso tse ananetsoeng sebakeng sa basebelisi ba mekhahlelo eohle; ba litšebeliso tse lefellang litšebeliso pele ba li fumana);
- Lihora le sebaka sa tšebetso moo basebelisi ba ka rekang metsi teng;

- Linomoro tsa mohala tsa libaka tsa thekiso;
- Lihora le sebaka sa tšebetso tsa litsi tsa WASCO;
- Linomoro tsa WASCO ho kenyeletsa le tseo ho ka letsetsoang ho tsona mahala;
- Methati e lateloang ha ho sebetsoanoa le lipotso mabapi le limithara, chelete e lefshoang ha ho etsoa litlhlahobo tsa litefiso ho li netefatsa;
- Likotlo tse fanoang ha motho a kena-kenane le thepa ea WASCO;
- Phano ea metsi a nang le boleng le tsela eo a tsoang ka eona; le
- Lipalo-palo tse nepahetseng tse behiloeng tse hlahang mithareng oa metsi.

## Lipehelo sebakeng sa ho etsa litsi tse fanang ka litšebeliso

WASCO e lokela bonyane, setsi sa eona se fane ka litšebeliso ho bonyane basebelisi ba litšebeliso ba 1,000 hape lipakeng tsa setsi sa phano ea litšebeliso le ntlo ea ho qetela e seke ea ba bohole bo fetang lik'hilomithara tse peli. WASCO e lebeletsoe ho ba le bonyane linoko tse leshome (10%) tsa metsi a rekisoang (li-token) tse tsoanang le tse fanoeng sebakeng seno tse behiloeng fela sebakeng sa ha ho ka ba le bothata. Bafani ba litšebeliso ba lokela ba sebetse lihareng tsa tšebetso tse tloaelehileng. Ka Moqebelo le Sontaha le matsatsing a phomolo ba sebetse ho tloha ka hora ea borobong hoseng ho isa ka hora ea pele motšoare oa mantsiboea.

## Lipehelo sebakeng sa ho kena-kenana le ho khaola khokelo

WASCO e tsoanela ho khaoloa phepelo ea metsi hang-hang moo ebang mosebelisi a kena-kenanoe le thepa. Moo likhokelo tse sa etsoang ka molao, WASCO e tla etsa khokelo-bocha (reconnections) nakong ea matsatsi a mabeli kamor'a hore mosebelisi a lefelle kotlo ea hae ka ho tlala 'me ho lokisoa moo ebang mosebelisi o ne a se a sentse thepa ea WASCO ■



# Tse ling tsa liqholotso tsa mehla tsa phano ea metsi

Litla-morao tsa tlhokahalo ea metsi ka lebaka la phetoho ea boemo ba leholimo.

**L**efapha la litšebeliso tsa Metsi le likhoere-khoere Metseng e Literopong (Urban Water and Sewerage Services -UWSS) le bile le khaello ea phepelo ea metsi ka lebaka la komello. Mocheso o mongata le pula e sa lekaneng ebile qholotso e kholo ntlheng ea metsi le lijalo 'me libakeng tse ling e bakile mafu a liphoofofo. Ho latela K'hamphani ea Metsi le Likhoere-khoere (WASCO), selemo sa 2019 e bile selemo se sebe haholo ntlheng ea ho fana ka phepelo ea metsi a sa feleng ho baahi ba metse e literopong le e ka thokoana ho literopo.


Sena se amme pokello ea lichelete ea K'hamphani kaha khaello ea metsi metseng e mabalane e entse hore WASCO e rekise metsi a manyane moo ho bileng le tšebeliso e tlaase ea metsi ke basebelisi ba ona.

“Baahi ba Leribe le Butha-Buthe ba ile ba hloka metsi ho tloha selemong sa 2018, moo malapa a mangata a ne a phela ka metsi a tsoang lilibeng tse sa sireletsoang. E ne e le boemo bo hloabaetsang ho bona sechaba se sokola empa rona re sa khone ho se thusa”, ho itsalo Monghali Tieli 'Moleli, Mookameli oa WASCO Maputsoe.

Tlhokahalo ea metsi e entse hore basebelisi ba metsi a WASCO ba hlahise maikutlo a bona a ho se khotsofale lipitsong tse neng li epiloe ke Lekhotla la Taolo ea Motlakase le Metsi Lesotho (LEWA) moo ba bileng ba kopa tharollo tsa nako e khutšoane le tsa moshoelella. Baahi ba bang ba metseng ea teropo ea Butha-Buthe ba hlalositse ho tsoenyeha hoa bona ka khaello ea phepelo ea metsi lengolong le ngolletsoeng LEWA. Ha e arabela litaba tsena, WASCO e hlalositse hore litanka tsa eona li ne li hloka metsi a lekaneng ho fepela malapa.

“Re ne re khona ho fepela metsi ka tsela e khotsofatsang kamorao hore lipula li ne. Re ne re behile ka sehloohong ho fepela lipetlele le litsi tsa tlhabollo ea batsoarua ka metsi pele ho libaka tse ling. Melatsoana, metsi a chekiloeng fatše (liborehole) le linoka tseo re neng re kha metsi ho tsona li ne li chele” a rialo, Monghali Sepinare Lintši, Mookameli oa WASCO Mokhotlong.

LEWA e ithutile hore basebelisi ba ne ba romelloa mekoloto ea metsi ea khoeli le khoeli empa ba ne ba se ba nkile likhoeli-khoeli ba hloka metsi. Mookameli oa WASCO Maputsoe, Monghali Tieli Moleli o bontšitse hore mabaka a neng a ka etsa hore basebelisi ba bang ba lefiso ke ka lebaka la ho se patale mekoloto ea bona ea pele ka nako 'me e ne e tsoala. O tsoetsepele ho eletsa sechaba hore bao, ba neng ba patetse mekitlane ea bona ka botlalo empa ba fumane ba ntse ba na le sekoloto ba etele liofisi tsa WASCO.

Lekhotla le eletsa Basotho ho sebelisa metsi ka hloko le ka linako tseo a fumanehang ka bongata. Litsebi tsa boemo ba leholimo tsa Lekala la Matla le Tsa Bolepi (Ministry of Energy and Meteorology) li ile tsa supa hore ka lebaka la phetoho ea boemo ba leholimo, mehloli ea metsi e tla tsoelapele ho qepha lefatše ka bophara. Ka lebaka leo, Lesotho ha le tla ba le qholotso ea ho ba le phepelo e lekaneng ea metsi. Lebaka le leng ke kholo ea sechaba se metseng ea literopo, se ekelitseng palo ea basebelisi ba metsi ekasitana le sebopeho sa naha. Hajoale, ba ikarabellang litabeng tsa metsi ba ntse ba lokisetsa ho kenya ka botlalo Morero oa Lesotho oa Phepelo ea Metsi Metseng e Mabalane (Lesotho Lowlands Water Supply Scheme) e le ho fokotsa khaello ea phepelo ea metsi metseng e joalo 



Basebetsi ba LEWA ba lumelisa Professor Lebohlang Moleko.

## LEWA e lakaletsa Professor Moleko tsela-tšoeu

Lekhotla la Taolo ea Motlakase le Metsi Lesotho (LEWA) le ile la etsa mokete oa ho lakaletsa Prof. Lebohlang Moleko tsela-tšoeu ka la 01 Pulungoana, 2019 kamor'a hore e be mookameli oa LEWA ho tloha ka Phuptjane 2017.

Ka nako eo a ntseng a eteletse Lekhotla pele, har'a mesebetsi e meng Prof. Moleko o ile a sebetsa e le moikarabelli ea ka sehloohong oa liqeto le mesebetsi eohle e etsoang ke LEWA, ho latela liphelelo tsa molao. Pele a ka tla sebetsa LEWA Prof. Moleko o ile a sebetsa libakeng tsa bohlokoa sechabeng. Har'a tse ling e bile Moemeli oa Lesotho naheng ea Republic of China ka selemo sa 1994.

Ka selemo sa 1999, o ile ea eba Moemeli oa Lesotho Washington DC, Linaheng tse Kopaneng tsa America (USA). Ho tloha ka Pherekhong 2002 ho isa ka 'Mesa 2005 o ile a ba New York moo a sebelitseng e le Moemeli oa Lesotho le Moemeli oa Kamehla (Permanent Representative) Mokhatlong oa Machaba (UN). E ile ea eba Motlatsi oa Moemeli ea khethehileng (Deputy Special Representative) oa Mongoli e Moholo



Phano ea limpho ho Professor Moleko.



Professor Moleko moketjaneng oa tumeliso ea hae.

oa UN (UN Secretary-General) Litabeng tsa Likamano tsa Ethiopia le Eritrea (UNMEE) ho tloha ka Loetse 2006 ho isa ka Hlakola 2009. Pele a ka tla sebetsa LEWA, Prof. Moleko e ne e le Moemeli e Moholo Komising ea Morero oa Metsi a Lihlaba Lesotho (LHWC).

“Boetelli-peleng ba hau bo babatsehang ha ho e-so ka le ka mohla o le mong moo bo thunthetsang seriti sa Lekhotla. Tšebetso ea rona e’a tsejoa kahare le kante/machabeng ke makhotla a taolo joaloka Mokhatlo oa Makhotla a Taolo oa Afrika (AFUR) le Mokhatlo oa Makhotla a Taolo ea Metsi oa tikoloho e Boroa le Bochabela ho Africa (ESAWAS). Basebetsi ka moka ba ananetse le ho thabela motsotso o mong le o mong oo u neng u ba le bona ‘me re u lakaletsa tse ntle feela le kamoso bo botle”, ho itsalo Monghali Thuso Ntlama,

Mookameli oa Lefapha la Taolo ea Moruo, lebitsong la basebetsi.

Basebetsi ba bang ba itse Prof. Moleko ke motho ea amohelang batho ka mofuthu mosebetsing oa hae le mosebetsing ea batho ba bang. Ba tiisitse hore leha e le moo a se a tsamaea, ba hahetse mantsoe a hae a khothatso mosebetsing lesaka, hape ba tla lula ba hopola semelo sa hae se setle.

Ha a arabela puong ea hae ea sehlooho Prof. Moleko o lebisitse liteboho tsa hae ho basebetsi ‘moho le eena ka tšebetso eo ba mo fileng eona. O tsetse pele ho hlalosa hore le eena ka tsela e tsoanang o ithutile ho motho e mong le e mong kahoo ba tsoelepele ho sebetsa ka boipabolo mosebetsing ea bona ▣



## Lingongoreho tsa sechaba mabapi le phano ea litšebeletso mefapheng a ESI le UWSS



**L**ekhotla la Taolo ea Motlakase le Metsi Lesotho (LEWA) le ile la kena letšolong la ho hlokomelisa sechaba ka thomo kapa mesebetsi ea lona.

Letšolo lena la LEWA le ne le reretsoe hore le thuse Lekhotla ho boloka likamano tsa moshoelella tsa basebelisi ba motlakase le metsi le sechaba. Letsolong lena LEWA e ne e felehelitsoe ke K'hamphani ea Motlakase ea Lesotho (LEC) le K'hamphani ea Metsi le Likhoerekhoere (WASCO) ho arabela lipotso tse mabapi le litšebeletso.

**Sechaba sa Qacha's Nek phuthehong ea LEWA e holim'a phano ea litšebeletso.**

Letšolo le bile le katleho kaha batho ba neng ba eba teng liphuthehong ebile boemeli ba basebelisi ba motlakase le metsi le sechaba bo neng bo kenyeleletsa marena, mak'haselara le baetapele ba sechaba le ba likereke hammoho le sechaba ka kakaretso. Lintlha tse neng li tšetsethoa lipitsong li ne li kenyeletsa tlhalosetso ea sechaba ea litefiso tsa metsi le motlakase tsa selemo sa 2019/20, tsela eo litletlebo tsa basebelisi ba motlakase



le metsi le sechaba li tlalehoang ka eona ho LEWA, phano e tsoileng matsoho ea litšebeletso le tokomane ea Lipehelo tsa Boleng ba Litšebeletso tsa Phepelo ea Motlakase, Metsi le Likhoere-khoere (QoSSS).

Sechaba se bontšitse kananelo ea sona moo litšebeletso tse tsoileng matsoho li fanoeng le moo li neng li lometsa. K'hamphani tse laoloang e leng LEC le WASCO, li arabile lipotso tsa sechaba ka tsela eo ba e utloisisang mabapi le phano ea litšebeletso.

Boholo ba lipotso holim'a mathata a neng a tobile ba nang le kobo ea bohali literekeng tsena kaofela, li kenyelilitse tse latelang 'me li ne li le holim'a phano ea litšebeletso:

- **Bosholu le ho kena-kenana le thepa ea motlakase le metsi:** Basebelisi ba khothalelitsoe ho qoba ho ikhokella motlakase kapa metsi ka thoko ho molao le ho tlaleha batho ba etsang sena.
- **Khaho ea matlo tlas'a lithapo tsa motlakase:** LEC e khothalelitse basebelisi ba motlakase ho qoba ho aha matlo tlas'a lithapo tsa motlakase tse kholo le tse nyane. E tsoetsepele ho ba khothaletsa ho batla tumello pele ba aha.
- **Tefo ea thepa e senyehileng:** Sechaba se bolelletsoe hore LEC e lefa feela thepa e senyehileng ka lebaka la bohlasoa ba eona, e seng ka lebaka la tšenyō e bakiloeng ke likoluo joaloka sefako le letolo/lehalima. Hape LEC ha e no lefa thepa e senyehileng ea basebelisi ba motlakase o sa hokeloang hantle. Sechaba se ile sa eletsoa hore se reke li-*antipower surge* e le ho sireletsa thepa ea motlakase.
- **Tieho ea ho khutlisa motlakase, tšitiso ea litšebeletso tsa metsi le likhoere-khoere:** Batho ba llile kahore LEC e lieha ho lokisa lithapo tse nyehileng le ho tlosa makala a lifate a nametseng

kaholim'a lithapo. Ba boetse ba tlaleha hore LEC e tlameha ho etsa letšolo la lithupelo tsa tšireletseho le polokeho ho hlokomelisa sechaba ka kotsi ea motlakase le mekhoe ea ho o sebelisa ka polokeho.

Sechaba se bontšitse ho se khotsofale mabapi le ho lieha hoa WASCO ho lokisa lipeipi tsa metsi. WASCO e ile ea suptjoa ka monoana ka taba ea ho siea mekoti e tsamaisang likhoere-khoere e sa koaheloa kaha e le ntho e kotsi sebakeng sa maphelo a batho. Sechaba se hlalositse hore WASCO e tlameha ho tebisa lipeipi ho fihlela lengoleng.

- **Tlhokahalo e kholo ea litšebeletso tsa WASCO:** Ba nang le kobo ea bohali ba bontšitse ngongoreho ea bona mabapi le kanetso ea litšebeletso tsa WASCO metseng e literopong. WASCO e hlalositse hore e sitoa ho kenella libakeng tse ling ka leba-ka la tlhokahalo ea lichelete sebakeng sa ho kenya thepa e tla ba ea moshoelella le litšebeletso tse tsoileng matsoho.
- **Litšebeletso tse mpe tsa metsi libakeng tse phahameng:** WASCO e hlalositse hore e sitoa ho hokela basebelisi ba metsi ba ahileng libakeng tse phahameng haholo. E tsoetsepele ho khothaletsa sechaba hore ka mekhoe eohle ho se qoba ho reka litša libakeng tse joalo.

Kahar'a mathata ana ao ba tobaneng le 'ona a letsatsi le letsatsi, sechaba lebohile Lekhotla ka ho ba le ponaletso, le ka ho fumaneha ka linako tsohle ebile ba na le tsotello mabapi le lingongoreho tsa bona. Leha ho le joalo, ba bontšitse hore matšolo a tsoanang a lokela ho etsoa bonyane habeli ka selemo sebaka ka seng. Ka lehlakoreng le leng, Lekhotla le netefalelitse Sechaba hore le tla lula le behile LEC le WASCO leihlo e le ho netefatsa hore li fane ka litšebeletso tsa boleng. Sechaba se kopiloa ho sebetsa 'moho le litho tsa. Komiti ea Setereke ea LEWA literekeng tsa bona □



Mookameli oa LEWA, Monghali Motlatsi Ramafole.

## LEWA e amohela Mookameli e mocha

**L**ekhotla la Taolo ea Motlakase le Metsi Lesotho (LEWA) le amohetse Mookameli oa lona e mocha e leng Monghali Motlatsi Ramafole ea qalileng tšebetso ho tloha ka la 01 Pulungoana, 2019.

Monghali Ramafole o na le mangolo a molao e leng Bachelor of Arts in Law le la Bachelor of Laws (LLB) ho tsoa Sekolong se Seholo sa Sechaba (National University of Lesotho).

Monghali Ramafole o na le litsebo le boiphihlelo tse ngata kaha a ile a qala ho sebetsa ele Akhente e Kholo ea Mofapahlooho (Principal Crown Counsel) Lekaleng la tsa Molao le Litaba tsa Paramente ka nako ea lilemo tse nne ho tloha ka selemo sa 1993. Kamor'a moo o ile a sebetsa Lekaleng la tsa Kantle (Ministry of Foreign Affairs).

Lekaleng la tsa Kantle o ile a sebetsa mesebetsi e latelang: Mookameli oa Lefapha la Litaba tsa Molao. Hape e bile Moemeli oa Lesotho naheng ea Federal

Democratic Republic of Ethiopia, Mokhatlong oa Linaha tsa Afrika (AU), Komisi ea Mokhatlo oa Machaba ea Moruo Afrika (UNECA) le Moemeli oa Kamehla Mokhatlong oa Machaba (UN).

Qetellong ea nako ea hae bosebeletsing ba sechaba Monghali Ramafole o sebelitse e le Mongoli oa 'Muso (Government Secretary) moo e neng e le Hlooho ea Bosebeletsi ba Sechaba Lesotho (Lesotho Civil Service. Har'a tse ling o sebelitse e le setsibi se ikemetseng litabeng tsa tsamaiso (administration), taolo (management) le puso e ntle (good governance).

LEWA e kholisehile hore litsebo le boiphihlelo ba Monghali Ramafole, ka ho khetholoha nakong eo a ileng a etella pele Bosebeletsi ba Sechaba le ho ba Moemeli oa naha machabeng, hammoho le ho ba setho sa Boto ea K'hamphani ea Metsi le Likhoere-khoere (WASCO), li tla etsa hore a atlehe ho tsamaisa Lekhotla (LEWA) □

## LEWA ke Molula–setulo oa komiti ea AFUR

**L**ekhotla la Taolo ea Motlakase le Metsi Lesotho (LEWA) le ile la khethoa e le Molula-setulo oa Komiti ea Metsi le Bohloeki (Water and Sanitation) ea 'Mamekhatlo ea Makhotla a Taolo Afrika (African Forum for Utility Regulators-AFUR) 'mokeng o akaretsang oa selemo oa leshome le metso e tšeletseng oa o neng o le Cairo, Egepeti ka Tšitoe 2019. Pele ho mona LEWA e ne e le Motlatsi oa Molula-setulo oa AFUR nakong ea lemo tse peli ho latela melaoana ea Mokhatlo.

Ka 2017, botho ba AFUR bo ile ba hola ho tloha ho linaha tse 27 ho isa ho tse 29. Litho tse ncha tseo ebileng litho tsa AFUR ke RURA ea Rwanda le HPSF ea Cameroon. Leha ho le joalo, kahar'a litho tse 27 selemong sa 2017, e ne litho tse 20 feela tse patetseng botho ha ho bapisoa le tse 17 tse bo patetseng ka selemo sa 2019. Komiti e ncha e kholo ea AFUR e filoe boikarabello ba ho kenya botho bo bocha e le hore bohle ba patale tseo ba lokelang ho li patala.

AFUR e na le likomiti tse 'ne, e leng tsa Matla, le Likhokanyo tsa Mahlale, Lipalangoang le Metsi le Bohloeki. Likomiti tsena li thehiloe ho ka sepheo sa

ho phethahatsa mananeo a fapaneng a mafapha a fapaneng komiting ka 'ngoe. Komiti e tšoanela ho etelloa pele ke setho se laolang litšebeliso kahara naha ea habo sona.

Tse ling tsa lintlha tseo AFUR e tsepamisitseng maikutlo ho tsona ke hore linaha tsa Afrika li hokahanye melao le melaoana ea tsamaiso, ho tsebisa litho ka melemo ea tsamaiso e ntle ea lik'hamphani hape le ho ntlafatsa sechaba. Litho tsa AFUR ke makhotla a taolo a mafapha a Matla (energy), Likhokahanyo tsa Mahlale (telecommunications), Lipalangoang (transport) le la Metsi le Bohloeki (water and sanitation).

AFUR ke letsoho la Mokhatlo oa Kopano ea Afrika (African Union-AU) le mananeo a ho ntlafatsa maemo a bophelo ba Ma-Afrika ho ipapisitsoe le moralo oa New Partnership for Africa's Development (NEPAD) oa ho nyolla le ho hlophisa bocha merero ea tsoelopele Afrika. Pono le sepheo sa AFUR e tsoa khaoloaneng ea 110 ea Tokomane ea Moralo-Tšebetso ea Tsosoloso ea Ntšetso-pele ea Afrika (New Economic Partnership for Africa-NEPAD), o ananelang le ho ikamahanya le ho thehoa hoa AFUR □



Metsi a rothang pompong a senya likete tsa lilitara tsa metsi ka selemo. Ha hona, se tlohelle lipompo li sa lokisoa.



## U ne u tseba?

**Hore ho boloka metsi, ho boloka matla.**

Ho baballa metsi ha e sa le e le ntho e bohlokoa, empa batho ba ea ba ntse ba hlokomela hore ho koala metsi ha ba ikuta kapa ba hlapa ho ka ba le melemo e meholo tikolohong. Hape ho etsa joalo ho fokotsa tšilafalo ea moea.